

BASES DO PROGRAMA AGROBIOTECH INNOVACIÓN

Programa Centro de Excelencia para o impulso do crecemento sustentable da peme innovadora galega

1. OBXECTO E ÁMBITO

O Programa Centro de Excelencia para o impulso do crecemento sustentable da peme innovadora galega - “AgroBiotech Innovación” - constitúe unha iniciativa desenvolvida polo Parque Tecnolóxico de Galicia, en colaboración coa Axencia Galega de Innovación, que aspira a incrementar o nivel de excelencia daquelas pemes innovadoras galegas que amosen potencial de crecemento e que estean centradas en actividades priorizadas na Estratexia de Especialización Intelixente de Galicia (RIS3).

As actividades do Programa están financiadas pola Axencia Galega de Innovación con cargo ao préstamo que a Administración Xeral do Estado concedeu á Xunta de Galicia a través do Ministerio de Economía e Competitividade para o desenvolvemento en Galicia da Estratexia Española de Innovación.

2. OBXECTIVO DO PROGRAMA

O Programa Centro de Excelencia para o impulso do crecemento sustentable da peme innovadora galega - “AgroBiotech Innovación”-persegue potenciar o despegue das empresas participantes a través dun plan de traballo práctico, orientado principalmente a aumentar o potencial innovador das pemes participantes galegas, favorecer o desenvolvemento de novos produtos e servizos innovadores, establecer relacións con novos socios e facilitar a transferencia e o acceso de información entre empresas.

O obxectivo é crear un espazo prolífico para o crecemento orgánico das empresas, a partir de procesos de toma de decisión de calidade que permitan xerar dinámicas de apoio aos equipos directivos das empresas para que, desde a valorización do coñecemento, desde a innovación, desde a internacionalización e co reforzamento das súas capacidades financeiras e de management, poidan emprender sendas de crecemento sustentable.

Para iso poñerase a disposición das empresas un plan de traballo que incidirá nos aspectos vinculados á estratexia, situación de mercado e funcionamento organizativo, co obxectivo de fortalecer as capacidades das empresas participantes co fin de:

- Mellorar a capacitación na xestión empresarial e nos modelos organizativos.
- Ampliar a comercialización de produtos e servizos innovadores.
- Desenvolver novos produtos e servizos con socios nacionais e internacionais nun marco de innovación aberta.

- Incrementar a capacidade de captación de financiamento público europeo (no marco da Estratexia H2020) así como de carácter privado.

Coa participación no Programa, aspírase a que, no prazo de dous anos tras a súa participación no mesmo, as empresas beneficiarias:

- **Avancen na senda da innovación** aumentando notablemente o seu potencial innovador, reflectido na dependencia das súas vendas dos produtos introducidos no mercado nos últimos dous anos.
- **Experimenten un crecemento significativo**, reflectido en cifras de facturación.
- **Presenten unha maior diversificación** das súas vendas, chegando aos mercados exteriores.
- **Incrementen a atracción de financiamento externo**, maximizando a captación de fondos públicos europeos (a través da participación en programas de H2020) e de fondos privados.

3. DESTINATARIOS DO PROGRAMA

Serán destinatarios deste Programa aquelas pemes, innovadoras e/ou de base tecnolóxica centradas en actividades priorizadas na RIS3 de Galicia, con establecemento operativo en Galicia. As características concretas que deberán cumprir os destinatarios serán definidas nas correspondentes convocatorias do Programa.

4. ENFOQUE DO PROGRAMA

O Programa, dado o seu carácter práctico, non se baseará unicamente na realización de actividades de formación teórica, senón tamén nas necesidades específicas de cada unha das empresas que participan nel.

Para iso, contarase con persoal experto e especializado nos distintos eidos a tratar e apostarase pola realización de itinerarios específicos para cada beneficiario en función das súas demandas e necesidades particulares.

Os contidos e actividades do Programa están enfocados especificamente aos perfís de Xerencia e primeiros niveis de Dirección e a súa participación activa no mesmo será fundamental. Isto débese a que, a súa responsabilidade e posición na empresa é a adecuada para a posta en marcha das actuacións e a aplicación dos coñecementos adquiridos aos distintos niveis da organización, así como para impulsar o cumprimento dos obxectivos marcados no Programa.

5. CONTIDO DO PROGRAMA

O Programa contempla a realización de sesións de traballo individual con titores e mentores, o deseño dun plan de traballo personalizado (itinerario de 7 meses de duración) orientado a reforzar o modelo de negocio e acelerar o desenvolvemento empresarial, a formación xeralista así como a celebración de talleres prácticos grupais para presentar técnicas e ferramentas, para xerar innovación e para mellorar a posición no mercado. O Programa tamén contempla a organización de eventos relacionados coa innovación, a tecnoloxía e a presenza exterior e a prestación de apoio para a captación de financiamento.

5.1. ACTIVIDADES PRINCIPAIS

Titorización e aceleración

O Programa contará cun equipo de titores especialistas coñecedores do eido da innovación galega e do desenvolvemento de negocio, que se encargarán de definir as necesidades de aceleración de cada unha das empresas participantes deseñando un plan de traballo cun itinerario específico para cada unha delas. Nestes itinerarios reflectiranse os obxectivos a acadar xunto coas fases, as actividades e os recursos necesarios para conseguilos. Os titores encargaranse de realizar o seguimento da consecución dos obxectivos marcados e de apoiar aos participantes durante todo o proceso.

Estas actividades levaranse a cabo nas propias instalacións da empresa co obxecto de profundizar na cultura e procesos da organización para que, unha vez rematado o proceso de titorización, constitúan o modo de facer da compañía.

Profesionalización e capacitación

As actividades de capacitación incluídas no Programa organizaranse en dous ámbitos:

- Capacitación xeralista, destinada a todas as empresas participantes, sobre plans de negocio, estratéxicos, detección de necesidades de formación dos mandos, estratexia fiscal, protección IPR, modelos de crecemento, comercialización internacional, comunicación centrada no negocio fronte a inversores, bancos, socios internacionais, institucións, etc.
- Capacitación específica baseada no itinerario específico deseñado para cada participante.

Mentorización especializada e networking

O Programa, en función dos itinerarios específicos definidos para cada empresa, contará coa participación de expertos de recoñecido prestixio e reputación internacional e con perfís adaptados ás necesidades dos distintos participantes, para a realización de diversas actividades: relacións comerciais, preparación de presentacións e propostas, asistencia a meetings internacionais, feiras, etc.

Realizaranse tamén sesións de networking con stakeholders, principalmente a nivel internacional, para axudar a identificar entidades de interese que axuden no éxito do proxecto.

Estas actividades realizaranse baixo distintos modelos, para adaptalas aos obxectivos das mesmas: masterclass, workshops, conferencias de poñentes de recoñecido prestixio, talleres grupais, entre outros.

Funding

Co obxectivo final de acadar fondos, realizaranse distintas actividades como son:

- Unha lonxa de investimentos, focalizada na atracción de posibles inversores.
- Preparación para asistencias individualizadas a eventos internacionais de venture capital.
- Análise de proxectos para presentar en convocatorias de fondos europeos da estratexia Horizonte 2020.

Os emprazamentos dispoñibles para o desenvolvemento das actividades serán o Parque Tecnolóxico de Galicia (Ourense), o Centro Tecnolóxico Agroalimentario (Lugo) e as sedes das propias empresas participantes no Programa. A elección do emprazamento para a realización das actividades realizarase atendendo á natureza da propia actividade e ás condicións específicas asociadas a cada unha delas.

Durante todo o desenvolvemento do Programa será requirido por parte das empresas participantes o compromiso de asistencia ás distintas actividades, independentemente do lugar elixido, e tendo en conta que:

- Nas primeiras semanas do Programa, as actividades desenvolveranse principalmente nas sedes das propias empresas. Estas estarán focalizadas na elaboración dos itinerarios específicos de cada unha das empresas para o que será preciso contar coa dispoñibilidade dos niveis de Xerencia e/ou Dirección para a celebración de reunións presenciais cos titores especializados.
- Con carácter xeral, as xornadas de formación e capacitación terán lugar no Parque Tecnolóxico de Galicia (Ourense) e no Centro Tecnolóxico Agroalimentario (Lugo). Serán celebradas nas tardes dos xoves e dos venres e nas mañás do sábado, pero non todas as semanas serán realizadas ao longo dos tres días.
- Con carácter puntual, será requirido a asistencia dos niveis de Xerencia e/ou Dirección das empresas participantes a eventos ou encontros sinalados como relevantes en liña cos itinerarios específicos elaborados para cada unha delas.

5.2. PLATAFORMA WEB

Ademais das actividades indicadas, os beneficiarios do Programa disporán de acceso a unha plataforma web para a cooperación e dinamización, na que se disporá, entre outros, de servizos de:

- Información de axudas e subvencións e convocatorias do Horizonte 2020.
- Informes de vixilancia sectorial.
- Acceso a ofertas e demandas tecnolóxicas (a través da rede Enterprise Europe Network - EEN).
- Información de interese para o desenvolvemento e a internacionalización de proxectos empresariais.
- Contidos de programas formativos, webinars e repositorio para compartir información específica do Programa.
- E foro para facilitar o intercambio de información entre os titores, mentores e entre eles mesmos.

A plataforma web de servizos estará accesible para os usuarios de todas as convocatorias do Programa máis aló da duración de cada unha delas, co obxectivo de ser un punto de encontro e participación de todos os usuarios.

5.3. SERVIZOS ADICIONAIS

As empresas participantes de cada unha das edicións do Programa, poderán asistir ás actividades formativas e de capacitación durante as vindeiras edicións do mesmo, sempre que sexa amosado o aproveitamento das accións realizadas polas mesmas no marco do Programa (en base aos resultados obtidos) e sexa xustificada a necesidade de acudir ás mesmas para acadar os obxectivos establecidos no Programa.

Por outra banda, unha vez finalizadas as actividades do Programa e acadados os obxectivos marcados ao inicio do mesmo, os beneficiarios contarán con acceso preferente ás actividades do IGAPE e ao financiamento a través dos fondos de capital-risco da Xunta de Galicia (XesGalicia).

6. DURACIÓN

O Programa está concebido para ter unha duración total aproximada de dous anos, con vocación de consolidación e continuidade, de xeito que cada ano sexa publicada unha nova edición do mesmo enfocada a sectores estratéxicos diferentes. Cada unha destas edicións terá unha duración aproximada de 7 meses.